

四庫全書

集部

欽定四庫全書

集部

古今禪藻集卷二十四

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官原任編修臣勵守謙

謄錄監生臣將繼熊

欽定四庫全書

古今禪藻集卷二十四

明釋正勉釋性通同輯

明七言律詩

曉過西湖

梵琦十一首

船上見月如可呼愛之且復留斯須青山倒影水連郭
白蘿作花香滿湖仙林寺遠鐘已動靈隱塔高燈欲無
西風吹人不得寐坐聽魚鱗翻菰蒲

圮橋

子房三世相韓家辛苦椎秦博浪沙不上青天扶日月
便歸丹壑老烟霞圮橋進履心長在漢室封侯鬢已華
惟有當時書一卷奈何人世事如麻

贈王使君

君持使節過繩橋已遣蠻夷感聖朝良將未誇班定遠
大臣猶數蓋寬饒川香野馬銜青草雪暗天鵞避阜鵬
西出陽關九千里歸來莫惜鬢蕭蕭

相家夜宴

璧月未出金風涼羣鳥啞啞鳴苑牆西山高居帝左右
北斗正挂天中央繡衣執樂三千指朱火籠紗十二行
坐待更闌賓客散蕭齋自炷辟邪香

贈西山隱者

花邊亭子水邊樓宰相歸來秉燭遊茅屋道人深夜坐
桂枝明月滿山秋儘教萬馬千車遠消得三平二滿休
誰不願持生煞柄獨誇疏傅有深謀

八月十五夜翫月

無根車轂是誰推不嫁姮娥豈用媒
八月正當三五夜
幾人曾賞百千迴
旋抽蓂莢初盈數
新釀葡萄正潑醅
避暑歸來宮殿冷
君王且進紫霞杯

都下春興

陌頭楊柳未全遮
青草萋萋帶玉沙
才子百篇敷錦繡
帝京三月繞烟花
曹瞞叵信劉玄德
管仲深知鮑叔牙
自古君臣不虛應
分明合曲奏琵琶

余嘗夢至一山聞杜鵑且約雪憲南還

出郭尋春不見春東華踏徧軟紅塵不知蝴蝶化為我
何處杜鵑來喚人苟蕨過時惟恐老櫻梅如豆正嘗新
及今無事早歸去莫待秋風江上蓴

梁山泊

天畔青青蘆葉齊晚來戛戛水禽啼一鉤慘淡衡山月
五色鸞環跨海霓新摘蓮花堪釀酒舊聞荇菜可為薺
北人大抵無高韻零落梭船傍柳隄

再過圮下懷子房

袞衣有缺爾能縫天遣勛勞刻鼎鐘太子身令爲國本
君王手自擇留封橋邊老父存黃石物外山人號赤松
今夜孤舟載明月不妨高臥想儀容

湖上追憶香山居士

蘇州刺史盡橫金磊落無人似醉吟爲郡三年滄海上
畫船十隻太湖心春歸紫翠鶯花塢秋著丹青橘柚林
山水不隨潮水變直從開闢到如今

病中作

宗泐十一首

身老那堪病更纏。小齋欹枕祇高眠。
階前秋雨連三日，籬下黃花自一年。
摩詰不知除病法，嵇康空著養生篇。
尚方再賜千金藥，慚愧皇恩下九天。

和程續古秋日見過兼次韻

上方高處古禪關。一曲清溪萬疊山。
松樹不嫌僧共老，菊花應笑客能閒。
西風岸口孤帆轉，落日林邊獨鳥還。
一自兵餘行樂少，且須今日盡歡顏。

入櫟山寫呈無極老禪

干戈擾擾客難禁避地來依碧嶂深亂裏獨驚浮世事
難中多見故人心千章古木羣峯合一徑長松十里陰
更欲移茅入重崦白雲無路可追尋

和張光弼留別

老來心事向誰論且對青山酒一尊湖上夢醒思舊將
江西書去問諸昆可憐漢祖今無廟還喜留侯尚有孫
手把過眉筇竹杖與僧閒步出松門

錢塘懷古

欲識錢塘王氣祖紫宸宮殿入青蕪朔方鍊騎飛天塹
師相樓船宿裏湖白鴈不知南國破青山還傍海門孤
百年又見城池改多少英雄屈壯圖

天地無情日月徂鳳凰山下久榛蕪獨憐內殿成荒寺
空見前山映後湖塞北有誰留一老海南無處問諸孤
蓬萊閣上秋風起先向燕京入畫圖

送憲上人歸臨海龍華寺

菊花開日問歸舟三載錢塘已倦游舊業池臺因夢去
異鄉風土為誰留白雲山寺楓林晚黃橘人家海岸秋
珍重而翁好懷抱幾時同倚夕佳樓

送福長老

五載西行同苦辛扶持老病最情真千山雨雪獨騎馬
萬里沙場不見人京國歸來天闕近鄉閭去建法幢新
今朝相見仍相別目斷孤雲碧海濱

送徐生之蜀省親

春風初起送江船
西上迢迢路八千
巫峽波濤通七澤
成都花柳接東川
元戎號令飛荒徼
公子才華騁少年
遙想峩眉山上月
夜深應照綵衣筵

偶作次王以中韻

柱笏高人塘外居
作詩直與古人如
偶從荷芰香邊得
間向簫簧節上書
白露濕階涼氣早
青燈照壁雨聲踈
曉來不署金吾事
帶劒承明去直廬

送曹國公北征

上將提軍事北征旌旗百萬出南京直教大漠銷邊警
豈但先鋒破敵營瀚海無冰堪飲馬天山有石可鐫名
由來衛霍多勲業從此沙場不用兵

次見心韻送濟上人歸省

萬金四首

苦學不耽春夜眠思家却泛春江船褰衣遠道草頭露
濯足故山花下泉黃鵠方懷少年志白雲偶賦歸來篇
再看入室領玄旨何限天香浮月邊

吳越兩山亭為蕭山尹尹本中賦

單父彈琴宓子賤蕭然作亭尹大夫吳山越山若可攬
王業霸業誰能圖一江潮生白縹渺萬壑雲起青模糊
自公退食樂登眺只喜政成民力蘇

錦莊漁隱圖為醫士作

錦莊園林錦不如幽深彷彿神仙居舍南舍北賸裁杏
水落水生惟釣魚嚴陵終辭光武祿郭玉素受涪翁書
眼前生意日已廣桃源雞犬同村墟

送王宗禮尚書督漕還朝

尚書持節下青冥漕粟千艘拱使星萬里非誇輕海道
一言端可重朝廷宮衣寵製黃金字官酒恩沾白玉瓶
曳履不妨頻入奏聖心虛佇為生靈

陸良貴顧仲瑛過綽墩壽寧寺有作次韻賦寄乃寺

梁僧繇畫龍點眼飛去之所

時蔚

禪榻經餘思二妙舟楫遠勞相問尋虎頭善畫稱絕筆
放翁吟詩多雅音枇杷當戶花如雪橘子帶霜香滿林
招提歲晏宵頻過莫將清興阻山陰

遊石湖蘭若二首

來復十八首

荷花蕩漾湖水深上有蘭若當高岑客吟時見後鳥下
僧定不聞鐘磬音雨香秋林橘子熟雲落空澗棠梨陰
閒來掃石坐竹裏靜與山人論素心

五龍之峯雲作屏雙厓削出芙蓉青何人澗底拾瑞草
有客松間采茯苓林風不驚虎臥石山雨忽來龍聽經
吳王臺榭今寂寞秋香薜荔花冥冥

奉寄元璞琦禪師

我昔巢松茂苑東白雲清賞此心同芭蕉樹下吟春雨
簷菊花前立曉風亂後溪山誰作主愁來江海總成翁
相思欲借峯頭鶴騎向龍門問遠公

野軒為海昌李茂才賦

海城車馬往來稀獨愛寒軒傍翠微春雨一村桑柘綠
秋風萬井稻梁肥燈前教子惟書卷座上論交盡布衣
昨日南鄰邀社飲醉騎黃犢月中歸

送徐誠中入闈

十載移家住越州聲名早已動諸侯千金不受淮南聘
一騎還為塞北遊潮落魚龍滄海夜風高鷹隼太行秋
防邊有策應須獻好慰蒼生社稷憂

送儒醫陳仲靖歸天台

白髮侯門懶曳裾買山東向赤城居折腰五斗辭微祿
繫肘千金得異書玉洞桃花和露種石田芝草帶雲鋤
也知醫國終為用四海瘡痍待掃除

送呂尚書兩淵運使

虎節光華下九天
鹺臺出使重承宣
御溝柳色新亭酒
官浦荷香醉
李船赤鹵夜熬連
萬竈白糧秋餉給
三邊
遙知為政多清暇
細讀夷吾海上篇

瞽者龍翔賣卜養親

賣卜都門養母慈
白頭重際太平時
地生蓍草春雲暖
座映萱花晝日遲
目有神光應內照
心無私欲可前知
逢人但自談忠孝
何必金錢重決疑

聽竹軒為陸隱君題

愛竹閒同阮籍期竹聲遙聽靜偏宜一林蒼雪停琴處
三徑微風駐履時寒帶松濤翻夜壑清隨荷雨響秋池
無閒早已忘喧寂截管誰將古調吹

送張僉事之山西

遙瞻使節碧雲中驄馬西行驛路通水合九河多禹蹟
地連三晉有堯風邊頭露下葡萄紫原上霜清枸杞紅
問俗也知勞撫字可無優政起疲癃

送西域丁鶴年兵後歸武昌省墓

燕雲何處是并州黃鶴磯頭問去舟海濶山長羈旅夢
天荒地老死生愁他鄉寒食身千里故壠斜陽土一抔
為語東歸華表鶴英雄遺骨幾人收

送錢子予新除博士致政還越中

脩髯如雪面如丹芟製新成野服寬湖近季真期卜宅
寺依靈徹話休官霜紅柿葉樽前寫月白荷花鏡裏看
有約沃州騎鶴去臥雲不畏碧山寒

烟波釣客為張道士賦

長鏡懶斂紫芝田獨向滄洲作浪仙半世乾坤孤艇外
五湖風月白鷗前菱租歲熟堪為饌魚膾秋肥不取錢
藉有玄真同雅調都將吟嘯寄閒年

送偰尚書致政歸溧陽

紫誥新題御墨香溧陽歸老問山莊地幽多識雲霞氣
天近還依日月光華底泉鳴春藥碓竹間風掃讀書床
從來相業傳家舊勲烈應看紀太常

甲寅歲病中述懷

嗒然枯坐竹方床
懶慢無心百慮忘
雨後摘蔬蒿苣綠
風前曬藥茯苓香
飛蛾夕掩銅盤燭
餓鼠朝窺瓦缶糧
幻世有生皆旅泊
歸休何地是吾鄉

送鄭秋巖知府之青州

江驛梅花映玉珂
都人祖帳動離歌
六龍馭日南瞻闕
五馬迎春北渡河
沃野平連燕薊遠
好山青入魯齊多
明時為政看高節
秋色千巖翠不磨

次韻衛府紀善危朝璣見寄

爾談東魯我談禪淮海相聞歎暮年劉向才名遺說苑
楊雄詞賦重甘泉收來柿葉朝頻寫吟到梅花夜不眠
早晚定逢濠上寺三生舊話得重圓

耕隱為南昌萬用中賦

山莊別築楚城西百畝桑陰水一溪莎草雨晴黃犢臥
稻花風暖白鳩啼沽來官酒春祈社讀罷農書曉灌畦
孝悌力田新有詔姓名還向御前題

金山寺

曇噩二首

崢嶸兩岸市廛開愛靜人尋此處來水底有天行日月
山中無地著塵埃塔擎燈影明雲杪船載鐘聲出浪堆
自信平生有仙骨好風吹上妙高臺

山陰舟中

平明飯罷促高梢撐出五雲門外橋離越王城一百里
到曹娥渡十分潮白翻晴雪浪花舞綠弄晚風蒲葉搖
西北陰沉天欲雨臥聽蓬韻學芭蕉

次韻奉和見心師遊石湖蘭若

妙聲 六首

楞伽峯如九疊屏何年截取匡廬青方同楚客賦招隱
不學山人吟采苓僧蹊盡種苾荔草梵美徧寫多羅經
諸天只在雨花外音樂六時來窈冥

近聞移居湖水頭蘭若下瞓蒼波流獮猴夜偷錫杖去
鷗鳥日傍闌干浮揚州月照五湖白洞庭木落三山秋
相望只隔半江水安得贈之雙佩鉤

次韻答沈行恕回京之作

客舍春寒樹影稀青山迎我入王畿雲開雉堞瞻金榜

日射龍章識袞衣御果近從仙苑賜天花多傍講筵飛
聖恩特許僕旬住攜得香烟滿袖歸

遊石湖次韻

黃山高人之所居金沙花明白石渠無錢愛養方外客
有口懶讀人間書采來青菌總堪食種得黃精還有儲
郭西十里不一到題詩為問今何如

題虎丘寺

有客題詩海涌峯高懷渺渺託冥鴻勾吳伯業荒烟外

梵塔觚稜杳靄中石坐千人亭可月劖埋三尺水還風
目前無限登臨意古木蒼藤叫郭公

小瀛洲

鰲海晴分五色霞鳳池多隱列仙家黃封日送宮壺酒
青鳥時銜御苑花雲外珮鑾聞步輦月中河漢見乘槎
君王舊聽尚書履回首銀屏隔絳紗

秋日歸虎丘

良琦二首

虎寺共作五年留幾度相攜上小舟楊柳春橋半塘寺

芙蓉夜月百花洲長林放宿閒支遁一室編蒲老睦州
此日獨歸懷往事空山草色不勝秋

次韻答見心和尚

龍門茅屋澗之隈亂後山花只自開數片白雲同散去
十年金錫不歸來月明老鶴啼春澗日落饑鳥集古臺
歲晚相期仍結社西湖賸覓白蓮裁

送仁之初上人遊武林

懷渭

舞鳳飛龍若箇邊天涯送遠獨悽然江山南渡降王宅

風雨西陵過客船踏雪馬塍春買樹鬪茶龍井夜分泉
落花寂寥東歸日烟暝冥冥叫杜鵑

應制題江東橋

溥洽二首

西出都門見石橋虎城千雉共岩峩浮龜曉渡江流穩
役鵠晴瞻漢影遙華表月明清露濕闌干日近彩雲飄
四方車騎多如雨舉目應思答聖朝

應詔放水燈因賦

持節馮夷向夕過遠分燈火出官河斗牛光動天垂野

風露聲沉水息波海族樓臺休罷市鮫人機杼不停梭
九泉無復悲長夜莫問南山白石歌

應制賦金陵春晚

半間

五雲深護鳳凰城海宇清寧旦氣平錦繡山河霞彩動
金銀宮觀日華明御溝垂柳雙鶯轉官道飛花萬馬鳴
試向西虹橋上望分明遐思接蓬瀛

客山陰寄湖上諸友

守仁 六首

蘭亭燕罷送羣賢獨客歸來閉戶眠夜壑有聲都是雨

春山無處不啼鵑放歌強挹浮丘袂乘興難迴剡曲船
因念少游平昔語孤燈相對益悽然

湘湖漫興寄獵微生

蘭堂客散酒船空湖上清游孰與同五月秋聲梅子雨
一天涼思藕花風烟將白鳥沈沙際雲帶青山落鏡中
自是僊翁阻杭越誰教天塹限西東

題雲門翠微深處

谿閣重重翠崦遮無時雲氣濕袈裟千峯樹色藏朝雨

六寺鐘聲送晚霞筆塚天寒收柿葉茶壇風落掃松花
倦遊每憶消閒地早晚扁舟向若耶

寄海上令祝良英

堂上琴聲久不聞江花江草思紛紛珠光夜淨浮滄海
蜃氣秋高化白雲漢室將軍雙玉斗郭家天馬五花文
上書欲叩天王陛願與吳民借寇君

寄湯德師

月旦曾評物外遊衣冠合數晉風流寧知後世非房琯

郤訢前身是惠休黃鳥催人歌伐木青山滿眼賦登樓
多情惟有花谿水不厭年年送客舟

七月十八日重過何氏山林與張守約同賦

南塢新秋穀正花步從真侶入烟霞山林重過將軍宅
天漢初回奉使槎滿地江湖身是客終宵風雨夢還家
十年爲說燈前事郤望青雲路轉賒

過彭蠡湖舟中次韻簡見心師 希能

楊柳青青聞櫂歌東風三月放船過山浮空翠濕烟霧

江出大魚吹浪波上疏無因繼嵩蓮論詩漫自儼陰何
同參不負凌霄約清夢時時繞薜蘿

寄見心和尚

元旭

曾共湖山作勝遊杖藜來往更風流一時俛仰成陳迹
千里飄零盡白頭落日青天無過雁秋風滄海有閒鷗
好泉聞道甘於醴安得同消萬古愁

次韻遊石湖蘭若

守道

郡城西來山水深石湖倒浸青瑤岑溪雲十里護僧舍

天樂六時鳴梵音下界塵埃日滾滾上方殿閣秋陰陰
吳王舊跡眼中見萬古事往傷人心

羊祜廟

廟在吳城南

道衍九首

探環桑下悟前身幼節知君不酖人祇使才謀扶晉室
肯施德澤被吳民荒祠積雨壚生蘚古屋無風壁受塵
今日經過思峴首舊碑剝落淚沾巾

京口覽古

譙撝年來戰血乾烟花猶自半凋殘五州山近朝雲亂

萬歲樓空夜月寒江水無潮通鍊甕野田有路到金壇
蕭梁事業今何在北固青青客倦看

再寄王耕雲

鳳皇山下足棲遲袍笏盈床想舊時青李朱禽曾有帖
白沙翠竹豈無詩燒畲蓺黍開黃壤鑿澗分泉貯綠池
却與野僧情最厚常時來往不相期

京都送雲海上人還山

朝辭魏闕返家林秋半江南尚綠陰鍾阜雲歸山寺近

石城湖落海門深僧中不有興亡事世上寧存去住心
此別似難期後會且留茶坐撫孤琴

十月一日金陵發船之北平

石頭城下水茫茫獨上官船去遠方食宿自憐同衛士
衣孟誰笑雜軍裝夜深多櫓聲搖月曉冷孤桅影帶霜
歷盡風波艱苦際無愁應只為賓王

寄虎丘蟾書記

聞道蟾公似贊公一瓶一鉢寄山中雲封蘿屋長疑雨

泉響松巖半是風履破只緣行脚久囊空非為作詩窮
遙思短簿祠前夜共聽寒鐘出澗東

題平坡寺

平坡杳杳挹西湖徑斷樵行敗葉鋪泉落石河聲愈急
雲歸沙樹遠疑無夜堂風靜紓帷慢曉井霜寒響轆轤
那得餘生辭世網捲衣來此日跏趺

舟中送戴伯兼還金華省親

吳中山水舊同遊上國辭歸復共舟青邑數家烟火夕

黃河兩岸荻花秋素絃聲帶離鴻慘杜酒香消遠客愁
明日歸家想歡慶雙親華髮未盈頭

春雪寄友

春釀微寒作雪飄化工渾似剪鮫綃雨兼霰霰穿櫺響
風颶輕輕到地消粉蝶撲人成隊亂玉塵逐馬去程遙
欲呼鄭谷同吟賞且與隣沽酒一瓢

送王宗禮尚書趣運還京

晏墳

轉海雲濤萬里賒長風指日望京華南州已入諸侯貢

北極初回奉使槎內宴宮花迎馬酒御溝官柳拂龍沙
從容好奏安時策還見車書混一家

秋日送二徒之京

笑堂

客路逢秋意慘悽吳歌楚此聽如迷海天一色雁雙去
山月半規復自啼心動故園頻入夢詩因佳景易成題
落霞孤鶩西風外更向何山問托棲

退隱惠山聽松菴次王達善韻

普真

泉上歸來已一年萬松陰裏屋三椽坐殘白日渾無事

買斷清風不費錢。緩墮山崖尋果樹。鶴穿林徑避茶烟。
王猷識我平生意時寄新詩一兩篇。

南屏道中

永龜

五月雨聲連六月。南屏雲氣擁柴扉。林巒有穴山精出。
嚴谷無人石燕飛。詩句偶從行處得。家鄉都在夢中歸。
朝來杖策溪南路。新水溶溶沒釣磯。

琴月軒為閔東魯作

玉壺清露洗乾坤。手拂絲桐月到門。春蝶夢殘疑白晝。

秋鴻飛盡又黃昏魄沉湘水終留怨影落梅花欲斷魂
喜有鸞膠能續響廣寒歌舞不堪論

曉發

東風卷雨曉雲收兩岸雞聲送客舟柔櫓不驚沙上鴈
殘燈猶照驛邊樓天連野水浮空闊斗轉銀河拂地流
遙望吳城何處是青山數點落長洲

為蔡用強題石城山房

石城環繞讀書房竹色松陰覆短牆半塢白雲行路斷

一溪流水落花香
陽坡牧馬餘春草
秋閣然藜取夜光
俊逸盡隨徵詔起
祇留猿鶴共徜徉

送王希說還姚江和南仲法師韻

吳越雲山兩地情
暮年相見五茸城
人民已覺今非昔
骨肉難忘弟與兄
秋水半陂蓴菜美
涼風千里葛衣輕
明朝又作東西別
柔櫓聲聲柳外鳴

題梅

羅浮仙子雪為顏
一笑相逢大樹間
淡抹長烟拖素練

瘦橫落日寫清灣玉龍吹徹腸空斷翠羽啼來夢忽還
彷彿花光三昧手嫩寒清曉到孤山

寄龍井和菴

大同 三首

一從龍井過東州幾度令人憶故丘湖上好山頻入夢
松南古塔獨闌愁春歸柳色開青眼月到梅花照白頭
十載倦遊天上客何時買得浙江舟

寄演福和尚

雨紅烟綠暮春時獨客終朝有所思白水漾沙金錯落

青山浮几玉參差一簾花妥鶯啼緩千里書成鶴去遲
後夜更看湖上月滿懷愁緒散如絲

寄心印法師

山房深夜冷於秋銀燭蟠烟吐玉虬情逐斷流歸浦口
夢隨飛雨到湖頭土苔凝紫花龕靜春草生香竹徑幽
千里懷情殊不惡坐來翻覺迥添愁

分題得朱雀橋治城送戴司訓

覺澄

五首

朱雀橋成晉武年行人一過一留連豪華寂寞沉秋水

野草淒涼起暮烟。王謝燕來巢已廢。劉郎詩在世空傳。
先生此別堪題柱。相與推輪送上天。

和杜牧之九日登高

九日登高鴈正飛。馬嘶山郭曉。風微菊花爛。漫堪幽賞。
尊酒留連盡醉歸。幾處園林澄夕霽。千家簾幕捲晴暉。
今逢詩客多才思。不讓當年杜繡衣。

雷公晚照

雷公古廟倚嵯峨。風景偏宜晚照多。野鶴巢邊松偃翠。

黑龍潭上水生波疎簾暮捲千家雨短笛晴吹萬頃禾
歸到故山行樂處詩成還下夕陽坡

永思堂為朱良玉賦

幾年不着老萊衣膝下承歡事總違每憶深恩流血淚
難將寸草報春暉夢回殘月初欹枕愁對斜陽半掩扉
俯仰為君歌此曲異鄉令我念庭闈

過比干廟

匹馬東風古道傍忠臣此地有祠堂犯顏竟不辭君去

剖腹寧堪為國亡
銅柱沉沙芳草合
鉅橋流水野花香
褒封祀典神猶在
細讀殘碑欲斷腸

遊五臺山次韻

覺同二首

北來乘興上崔嵬
天外捫蘿鳥徑迴
寒谷未秋先落葉
陰崖不雨自生雷
低懸銀漢星千點
俯視滄溟水一盃
笑指曼殊棲跡處
幾經劫火不曾灰

陪蘇州黃琮遊靈隱寺

攀蘿躡履上丹梯
身在層霄斗柄低
歲久洞猿隨物化

春來花鳥向人啼蟾宮桂子飄雲外鷺嶺蓮華派竺西
謝客亭邊遺跡泯年來芳草與堵齊

輓史友桂

本源二首

木葉霜飛五夜殘薤歌聲斷涕汎瀾問梅人去山亭冷
釣月船空野水寒別館瑤琴無復奏東籬黃菊有誰看
不堪翹首斜陽外馬鬣新封土未乾

過岳武穆墓

出師頻捷報君恩十二金牌下帝闈豈料浮雲遮白日

空懷銳氣復中原湖山共繞千年恨草木長含萬古冤
百戰英雄今已矣獨留忠節照乾坤

和楊主事春日早朝

文湛三首

西山月落漏聲殘閭門開擁百官鶯轉帝城春色曉
燭搖宮扇曙光寒九天韶樂雲中度萬樹仙花仗外看
獨有相如多渴病朝朝清露滴銅盤

紫陽道院和張天錫韻

聞向蓬萊頂上行道人相見話長生巖扉半掩雲霞色

石屋惟聞澗水聲
陰洞草香春走鹿
靈源花發曉啼鶯
如何不見遼東鶴
千古江城月自明

酬周夢椿

故園東望思依微
滿目西風客未歸
江上鴻聲驚別夢
天涯草色上征衣
身隨遠浪同飄梗
家在空山獨掩扉
明日一竿滄海去
白鷗應笑未忘機

秋興二首

廣澈 四首

夕陽樓上倚闌時
舉目江湖有所思
薊北山川燕故國

錢塘城郭宋遺基鴈來不帶中郎信木落空歌武帝辭
萬里風烟秋一色杜陵何事不勝悲

長空萬里見秋毫獨自吟詩向次寥秋水芙蓉空爛漫
晚霜楓葉盡飄颻七松處士甘肥遜五柳先生懶折腰
尚賴四方英俊在野人空老聖明朝

青塚

淚眼盈盈出漢庭君王空惜玉娉婷名因圖畫終難易
怨入琵琶不可聽天上一輪同皎潔眼前諸物盡羶腥

當時若賂丹青手爭得胡天墓草青

田家即事

四月農家事事忙
曉分陂水灌新秧
雞初鳴際爭炊黍
蠶未眠時且問桑
處處薰風催麥秀
村村烟火焙茶香
可憐賦外徵求急
多少饑氓泣兩行

楚江秋曉次沈石田韻

明秀十四首

草寒霜渚夢悠悠
衡嶽西風落木秋
病裏斷猿司馬淚
吟餘殘月仲宣樓
自憐江漢猶遲暮
誰採芙蓉寄遠遊

鴻雁一行斜不度水光山色滿汀洲

山川搖落露華晞野寺鳴鐘破曙暉千里人烟江郭靜
數聲漁笛水禽飛寒催刀尺風霜早日遠關河信息稀
叢菊又開身在客長沙誰念未成衣

寄陳句溪

故人病臥寒無氈明月羨影箕山泉自搔短髮向天笑
開過黃花對雨眠海底珊瑚豈無樹床頭瓊瑤知有篇
相然昨夜入我夢握手柴門落日邊

送祚長老還北京

山水南行又北歸著來寒衲換春衣桃花笑雨機先悟
柳絮沾泥錫自飛明月一單棲海寺白雲千里憶京圻
江東芳草牽詩夢況值潮生采石磯

仲秋汎澈淑湖董蘿石許東山朱西村陳旬溪許
九杞孫太白沈紫峽同賦

人物百年滄海上釣竿裊裊拂珊瑚前峯吹笛月在水
中流放歌秋滿湖夜靜魚龍迴浦澈天低星斗動菰蒲

山川勝槩自今昔天柱洞庭還有無

懷孫太白山人

階前黃葉堆欲滿湖上白雲間自來千里秋風悲斷鴈
兩峯寒日憶登臺未能明月同移棹想見黃花獨舉杯
吟徧長松千萬樹南屏落日寺門開

感興用王履吉韻

江邊雨色晚寒輕昨夜柴門水又生桃葉隔溪猶喚渡
梨花沽酒正聞鶯何人得似張平子有客真如阮步兵

富貴浮雲歌一放玉壺還對美人傾

挽淵湛空

淵雲南人終于杭之佛國山

大千沙界空無住坐破蒲團不露機萬里秋風吹落日
一龕野色上閒扉袖中山海家何在世路干戈道不違
懸想精魂似圓澤葛洪川畔作雲歸

次韻答友

廬山高兮黃河深短髮素袍仍此心抱甕真如漢陰老
卜居亦有杜陵吟寄書鴻鴈秋天雨把酒花枝春日陰

准擬殘年載江雪釣舟重為故人尋

嘗茶

小堂春晚正寥寥洗水嘗茶帶雨燒病起不知紅葉老
閑門忽報白雲招松邊落日明虛閣夢裏西山度野橋
我已慵書今數月怪來幽思在芭蕉

九日

重陽獨坐西巖雨落木秋風吹布袍聊對江山呼濁酒
自披雲霧讀離騷杜陵白髮窮愁在彭澤黃花想像高

於我慚無一字補朝廷功業有英豪

顧子重陳南賓沈懋學吳天澤九日攜酒勝果山

登高

越王臺上送長歌落日秋風感慨多草莽野烟諸寢殿
寺門黃葉舊山河高江舟楫來鴻鴈絕頂磛壘上薜蘿
此日相逢總陶謝風流文彩復如何

中秋汎湖

寺門湖水清如鏡不與遊人照白頭豈獨尊前千頃月

更憐笛裏滿湖秋蘋花洗盡香堪把荷葉拂衣涼未收
此夜瀟湘洞庭上放歌誰得坐輕舟

甲午歲四月湖上感事

皂蓋朱幡簇仗齊西湖日月夜歸遲斷橋豈是長春地
精舍多妨結夏時朱閣捲簾驚燕子畫船呼燭照花枝
玉壺美酒民膏血只有城中太守知

寄徐豐崖先生初任桐城教諭

永瑛

六首

秦駐西邊落日斜楚江南望白雲遮草香泮水菁莪雨

春滿琴壇杏子花天闊鄉心傳海鴈官閒詩夢破林鴉
胸中知有五色線補袞終當用帝家

寄劉海村揮使

射策談兵屬老成轅門文武冠時名戰袍舊卸團花錦
牙帳新辭細柳營星斗中宵懸劒氣江山春日鵠詩情
騷壇虎踞誇餘勇賦就銚歌頌聖明

寄沈紫峽

沈居鄰葛洪
井顧况書臺

三年不見沈山人江水迢迢悵望頻細雨別來黃菊候

高風長在白綸巾書臺深處誰相遇丹井西邊獨隱淪
雲木兩峯無暑到不知城市有紅塵

贈鑑可簡住持永祚即歸妙光

寺門鐘鼓動秋山曉日輝輝上竹關黃葉千峯初出定
白雲半榻又飛還水歸滄海知宗派花發寒巖識道顏
去住無心隨所遇鑪薰貝葉歲華閒

寄孫白峯

時為江西教諭

忽憶孫登我欲求海天明月獨登樓高吟尚想西巖雪

一別俄驚八月秋萬里烟塵悲戍鼓三江風浪阻漁舟
何時得共鷗波裏薄采江籬慰遠愁

與隣僧夜坐

草廬溪上淨春花衲子談玄夜煮茶遁跡不逢秦二世
安貧寧識魯諸家水風涼薦荷衣爽山月低穿薜荔斜
裘馬故人休問及數函經卷是生涯

送金豐村侍御兄北上

法聚 八首

錦帆高日動江干用世寧爲惜別難多略擬聞新諫草

一貧應識舊郎官
雲鳧紫闕同仙侶
池草青春夢慚殘
蒼鬢易為憂
國短更須退食謾加餐

西湖次錢學士韻

大隄迎接鳳山遙
金勒東風細
馬驕芳草不知埋帝鳥
柳枝猶自學宮腰
天空水月三千頃
春老鶯花十二橋
見說樓船醉妍少
平章獨免紫宸朝

越王臺

越王臺上客登眺
范蠡湖頭草正新
敵國荒涼吳鹿豕

故宮行在宋君臣杖藜遠塞風烟暮花木深城雨露春
往事不須悲落日高歌獨立恐傷神

同豐村兄沈竹石初夏江村泛舟用杜韻

挂席綠陰溪水生桑梓暮雲俱故情白首無何野老在
青春幾負江花明題詩欲扣水西寺問酒復歎湖南城
月明夜久坐不寐吹邃柳堤星斗橫

白溪贈禪友

鷗波十里草堂前水觀明通靜裏禪雲母夜光沉貝館

鮫綃秋淚泣珠淵影空不見雙林鶴香度應知九品蓮
兩岸月明吹笛裏蘆花飛落釣魚船

吳山秋望呈張侍御

子胥廟前江日晡越王城頭雲有無故宮臺榭幾黃葉
南度寢園今綠蕪長笛闔山瞻北固清樽魚鳥傍西湖
蕭蕭落木蒼郊外幾處寒烟破屋孤

禮中峯塔

玉柱峯高生翠寒寶龕丹几一燈懸萬方龍象袈裟下

百億山河柱杖前幻住早知心已了活埋猶喜法無傳
辯香合爪春風裏一夜梅花月在天

石城夜泊

石城山勢鬱宕峯巒燕子磯寒落晚潮雲際樓臺開佛界
水邊巖洞繫魚船龍蟠鳳翥留雙闕草色江聲漫六朝
形勝不磨傷往事短蓬春雨夜瀟瀟

人日

祖福 四首

駕與湖頭春水生白龍祠前風日晴梅花作意開自好

柏葉向人殊有情南國十年多羽檄北山此日有柴荆
杖藜物色總春事回首江湖眼獨明

對雨用何仲默韻

城上雲霾朝不散江門雨脚晚猶垂天寒花鳥只欲暮
日遠江湖空自悲芳草山川迷客路中原宮闕濕軍麾
美人何處音書絕寂寞柴荆有所思

九日奉答雲谷見招

招邀已負重陽客乘興應憐此日遊南國黃花仍臥病

西風白鴈重悲秋久慙龍劒韜塵匣且得魚竿伴野鷗
日暮登臺頻悵望江門落木暗孤洲

杪秋墨山先生過訪龍淵山閣

晚風江郭動高寒山閣坐深城漏殘隔歲酒杯方晤語
幾回秋月得同看謾言舟楫臨河別須信風塵會面難
道在滄洲君自適鷺鶴吾分一枝安

江上

士墨

春江渺渺春草生蘿蕪不盡王孫情青山影帶杖藜遠

落日光動漁蓑明鷗鷺羣飛下淺渚林原野哭聞孤城
人事時憂不自理長歌清淚時縱橫

春日寄何令升

僧悅四首

梅花溪上見寒松遙憶君家桂樹叢曙色乍開伊闕下
春光猶在宛陽東高吟無那多逢雨短翮何由得御風
歲月依稀黃曲老獨留青鏡照虛空

望寶所塔燈同汎祐舟分賦

塔涌芙蓉寶炬然星河燦爛共諸天蛟龍乍起真珠映

風雨時驚舍利懸浮影半侵隄上水飛光遙隔望中烟
湖山莫辨歸來夜香霧鈴音自一船

唐藩送汪元伯博士奉使還朝

青雲翠蓋促輕塵馬上看山二月春雨色一鞭花外曉
雞鳴千樹隴頭新懽成不擬梁中使怨別空貽休上人
獨有夜來松際月清光猶照宛城闉

弔孔炎宗侯

月照樓臺玉樹殘啼鳥夜夜獨含酸魂歸大夢星初殞

名在中原骨未寒掩淚不堪秦失弔開絰已絕廣陵彈
今將半偈留君墓莫作延陵一効看



古今禪藻集卷二十四

欽定四庫全書

集部

古今禪藻集卷二十六

詳校官庶吉士臣謝菴飴

主事銜臣徐以坤覆勘

總校官庶吉士臣倉聖脉

校對官原任編修臣勵守謙

賡錄監生臣蔣繼熊

欽定四庫全書

古今禪藻集卷二十五

明釋正勉釋性通同輯

明

七言律詩

住五峯答次向九龍韻

佛峒

耽幽喜住碧山中，萬疊烟霞隱亂峯。
日色遙傳高閣磬，潮音初散講堂鐘。
焚香靜夜還揮麈，下榻兼旬為聽松。
海內只今閒謝屐，獨憐猿鹤伴仙蹤。

咏苔

道乾

翠色遙連薜荔陰紅塵一點未能侵沾泥曾上登山屐
帶雨常緣挂壁琴曲徑蝸涎凝處濕閒庭鶴跡印來深
青錢滿地從教拾難當遊人貰酒金

賦得古村贈友

景昂二首

竹門菊徑綠溪瀆筆架書籤四座陳舊隱合名龐德里
高風奚減上皇人秋登場圃雞豚散寒入園林橘柚新
靜夜窅然忘去住青燈聯榻重相親

賦得潛西贈友

了翁家住瀼東西占斷風光花滿堤巖桂香浮秋氣肅江楓紅映夕陽低浩歌閒引林間鶴沈醉猶聞午後雞更喜歲豐新釀熟時邀六逸過潛溪

九日太史邢公宴集

果斌

山中風景最宜秋叢桂霏香滿竹樓忽訝北扉玄客至共看西嶂白雲浮坐臨小圃苔侵屐話到真空石點頭無那夕陽歸思起可能明發更追遊

白鹿

胡總制耀兵越
獲白鹿以獻

方澤 四首

元戎出獵野雲空白鹿銀騰耀武功墮角或從瑤水上
食革應在雪山中狼歸漫紀千年瑞雉獻還聞九譯通
何似兩階千羽動蹌蹌應舞玉墀風

賦得閨七夕

星槎傍月拂笙歌銀漢仍傳帝女過烏鵲橋邊重駐輦
鳳凰機上兩停梭香浮翠幄宵方永羅結蛛絲巧遂多
自笑空山雲臥者漫同詞客賦明河

除夜對雪

江城燎火正凝霞
密雪旋迷十萬家
却向鑪邊飛作雨
偶經燈畔落成花
力侵衣絮心同冷
光映窓紗髮並華
詰旦祝禧先有瑞
會從龍象曳袈裟

弔岳武穆

廟門松檜晝森森
風起如聞鼓角音
日月猶懸南返駕
關山未死北征心
雲來朔漠陰長慘
潮至錢塘勢自深
棲鳥似知千載恨
含啼飛度碧湖濱

送林平厓之京

正念 二首

八月高槐樹樹花平橋流水逐溪斜比來北雁無音問
望入南雲有歲華燈火幾羣鰯菜市朋從何處斗牛槎
酒杯碁局平生事白首都城別是家

蘆洲

八月九月蘆花明大洲小洲風露盈舟人漁子自相向
江吟岸笛時爭清當軒襟帶鷗鳥近亞席燈火魚龍驚
直看玉樹過千尺長使蒹葭左右橫

答友惠菊

圓戒

空山搖落閉門時，忽喜餘芳寄遠思。
雅質向人渾欲語，寒香繞榻訝催詩。
神超色相元無染，節抱風霜益自奇。
愛爾乞歸陶處士，白頭三徑結幽期。

龍南山中喜恒吾衡石過訪

圓珂二首

扁舟出郭北風寒，入社還尋貝葉看。
過去道安終莫及，再來何遯見應難。
未忘月影光忘水，只愛梅花不愛官。
麟鳳此時雖得意，漢家肯放網羅寬。

朱石門何恒吾泛雪而至賦贈

玉人歌扇撲楊花門外時來問鹿車凍壑偶攜雙杖入
寒梅共折一枝斜心安慧可曾忘臂興盡王猷欲返槎
此去不知東郭履明朝踏雪過誰家

重登南張祠感舊

圓理 三首

蒼龍橋畔暮維舟斜日荒烟欲喚愁華表更無歸鶴下
廟門空有斷碑留笙歌幾處來青舫鐘梵何人對白鷗
重倚回闌覩陳迹却憐身在夢中遊

輓月泉聚禪師

聞說天池罷講幃
獅林從此大音稀
天花自點跏趺石
谷鳥猶窺補衲衣
澗底月來空有像
幡頭風動寂無機
從教語落諸方去
惆悵令人對夕暉

春暮彭冲溪徐玄
嶠項少嶽嚴少渠
過覩雨中牡丹分
得芳字

尊俎臨軒午正長
數枝留得雨中芳
空餘興慶池邊色
不是平章宅裏香
雲捧髻鬟嬌欲墮
膩流脂水淡成粧

品題獨許陰何輩揮灑爭傳寡和章

謁文太史徵仲

戒襄

先生曾作祕書郎三徑歸來鬢未霜江海有心懸魏闕
烟霞無夢入明光吳城白酒春長醉茂苑黃花晚益香
獨向門牆窺藻翰晉家墨史漢文章

留別龍華月清上人

德清八首

樹下逢君已廿年眼前四世總如然此心直入雲霄外
往事都歸幻化邊筋骨縱銷肝膽在關山雖隔塞鴻連

分携莫灑臨岐淚尚有龍華未了緣

南州張相國丁大叅回舟中述懷

江洲芳草正萋萋已到津梁路不迷萬里乾坤孤杖外
片帆風雨大江西顚容踪跡同魚鳥終是形骸似木雞
遙望五湖煙浪闊不堪回首白雲低

信宿敲城洪福寺懷達觀禪師有引

余弘法罹難蒙恩貶竄嶺海辱達師北走視余久遲
此間及至師已買舟南矣余信宿於此感而賦詩

天涯何處問同遊津濟先登彼岸頭塵世大都俱浪跡
乾坤從此任虛舟懷人夢徹三更月去國心懸萬古愁
百戰場空衰草徧黃河不盡水東流

端州慶雲書院懷制府大司馬陳公

花宮高倚七星傍門對江流萬里長桂樹婆娑寒自影
珠璣錯落夜生光山圍城郭森如戟月照庭除白似霜
回首蓬萊天際遠不堪道路滿甘棠

奉贈制府戴公累捷特進大司馬

幕府霜威鼓角清形弓元自重專征夜郎初拔蠻夷壘
瘴海旋收草木兵掃蕩幾空封豕穴招徠遠築受降城
懸知早晚趨丹陛帝識尚書曳履聲

甲辰曹溪奉臺檄還戍

十年混跡走風塵著處難容自在身擬向深山尋鹿豕
翻令下里厭陽春誰知瘴海從戎客倒是江湖沒事人
莫謂塞翁悲失馬從來禍福未堪論

祕魔巖

羊腸百折任青藜草莽蕭蕭仄徑迷絕壁倚天應隘日
斷厓無路只飛梯依人野鶴尋常下逐客山猿日夜啼
自是烟霞隨去住到來元不費招攜

登凌霄峯絕頂

獨上高峯倚杖藜侵人空翠轉淒迷西來二目如鵬翼
東去千山似馬蹄巖壑久稱獅子窟山林終許象王棲
吾來欲說無生法塵尾纔揮萬象低

九日友人約登高阻雨

希復二首

聯翩鴻雁下寒塘不道西風遽已涼客有窮愁闌晚節
菊無嘉色黯秋陽侵燈細雨窓交暗匝樹濃雲水共長
此日登高空我望籃輿那得出柴桑

送尤六村赴河南潘陳州之招

千里辭家問故人路岐不憚朔風頻心銜潘岳稱知己
夢入陳州似比隣江色遠浮霜嶠冷雁聲初動稻梁新
一觴出祖非專別為訂歸來及早春

送趙仁甫祔父櫬還閩

真謐 四首

遊絲撩亂落花時送客西征悵別離詎謂藏舟連壑逝
那堪扶櫂入閨馳淒清夜月緩啼早嗚咽春流鷗去遲
禮戒過傷應自惜不須苦誦蓼莪詩

送黎太博擢黃安令

餞別離筵繡水西垂楊繫馬只頻嘶雲將飛鳥懸青漢
天賜除書帶紫泥墨綬生香江草綠春風入楚縣花齊
郎官舊有名湖在公暇能無一品題

奉送龔郡侯入覲

何人不說少卿賢解劖民風望自偏五馬如雲馳禹甸
孤心捧日覲堯天形墀肅穆鳴珂裏玉殿綱緼曳佩前
虛席定應勞聖主蒼生亟待賜金還

將之金陵答姚山人叔信

浮身踪跡似飄雲此別寧愁落葉分未到西山尋古寺
却逢白月話離羣荒途拄杖橫烟水逆旅簾瓢挂夕曛
帝里得逢猿鳥便尺書那惜寄徵君

同諸君集鳳凰臺得中字

洪恩 八首

紫鳳青蓮足並雄登臺猶想異時風山閑晚霽收殘雨
日射寒烟挂斷虹疇昔齊梁詞較靡當蓬枚馬賦偏工
蕭蕭落木無窮思六代豪華感慨中

贈朱處士

閨戶常多載酒徒北窓高臥著潛夫弢中矢下聊城約
袖裏鉛騎晉鄙符滿架琴書供嘯傲到門松菊豈荒蕪
長安自愛韓康隱何事扁舟去五湖

枕流閣爲吳幼安賦

青溪曲曲柳條條小閣琴書慰寂寥鍾阜雲來春帶雨
秦淮月落夜通潮觀風上國唯尊魯洗耳中流豈避堯
南郭東山相映發不須重憶武陵遙

曉發箭闕

臺榭參差出萬松海門初日上高春石穿乍可緣飛騎
箭闕齊諧事祖龍半嶺雲生空翠合滿林花散曙烟封
因貪隔岸湖光秀行盡春山七十峯

登淮南懷柔閣

向洋新漲一登樓雲裏飛湍桂碧流不為釣磯思漂母
空餘殘壘說韓侯傍淮野色寒相映近海明霞夜不收
信美懷柔終異土平原無限夕陽秋

重陽前二日姚使君招集綺霞閣送吳叔嘉北上
刺史招攜興不孤觀風吳季酒頻呼未逢九日酬黃菊
且對千山進紫萸閣倚西南當勝地江盤東北下長途
知從燕市尋豪俠豈問金臺築有無

元旦

蓮華峯下兩安居昨夜人言是歲除齒髮有衰過半百
山河無改只須臾風疎梅萼香仍結雨洗苔茵翠欲舒
石上寒松閒倚杖相隨流水出行厨

秋日過吳氏經閣

誰向空門學布金新開龍藏樹祇林衣裁薜荔頭陀製
人類蓮華不染心旛影到溪成梵字經聲出閣總潮音
氤氳細細靈香散識得諸天莫外尋

寄雲東

法生

十年滄海共離羣三月風塵信未聞芳草閉門春苒苒
落花啼鳥暮紛紛歲華江上看流水世事人間喻薄雲
鴈宿天台何處所采芝揜葛幸同君

新柳

智舷 四首

謾說隋堤鬪早春還應妬殺楚宮人一時看去青於眼
幾處愁來翠欲顰夜雨尚憐勝不得東風只管舞教頻
更堪亭外旋攀折那有長條拂水濱

送友

去年九月辭山徑是日迎霜葉盡飛預採蕨薇為旅食
更裁薜荔作征衣芒鞋整後猶沾蘚隣舍行時為掩扉
春仲煩君到湖寺梅花開過柳依依

其二

煮石樵青隱鹿田毀垣破屋住多年微吟看落松邊月
閒坐聽飛竹外泉何處世間堪遠客誰家林下接高賢
知君雖未還山竇肯放塵游野服前

送谷響入匡廬

飄然汝去躡何峯六月匡廬雪尚封芒履不妨江路草
淨瓶將桂石門松雲開嶺外逢僧影日落巖前見虎踪
聞道遠公蓮再發須知元不異禪宗

春日寄贈屠長卿

德勝八首

縱謫人間氣色豪何須獻納白雲曹文章一代老青鬢
日月雙精奪彩毫夜雨夢醒吳地冷春風望斷越山高
河沙藤葛忘言話一轉何妨片語勞

臘日對雪得表弟虔州書答此

鼻觀寒林滿雪香忽驚遊子戀他鄉梅花寂寂枝空白
楊柳依依葉故黃萬里封書來震澤一宵飛夢過潯陽
虔南越北論兄弟兄自晨參弟自商

落花流水

落花流水自春秋冷看人生暗白頭齊相不知稱後裔
漢家何事在前籌年華漸去真難挽風月時逢只暫留
所以貴他賢達者不將身世事窮愁

病鶴

林公不鍛總難飛玉砌瑤階伴侶稀曾是缑山仙跨去
那容華表病來歸清霜瘦怯丹砂頂明月寒生白氅衣
倦翮暫教棲蕙帳九霄無用戰能肥

答道可佛可八月十八日同諸友人海上看潮有懷之作

滄溟八月大風高此際還能念鬱陶避世真應慚爾輩
望洋空擬向吾曹五山徒步齊羣聖幾錫聯飛駐六鰐
何處得來龍領物開緘猶帶海門濤

讀近時諸名家集有感

普天無事日謳吟誰道新書事若林貞烈偏多生繡閣
忠良不盡出黃金人人卿相歸田老處處將軍入虜深
競有文章攻左馬也應微念董狐心

寄題芙蓉窟

高陽池館遠嵯峨問道芙蓉窟裡多霞暈越溪晴浣水
月明洛浦夜凌波渾驚玉女笑開口忽訝天孫偷渡河
儘著容華曾不忌楊家姊妹奈君何

友人園居咏梅花

千樹梅花鑿石栽枝枝相亞玉徘徊野人不作羅浮夢
地主何如水部才自恐飄零呵凍折若為衰老寄春來
杖頭多挿殊無恙歲歲年年訪雪開

過金澤寺次韵

福聚

祇園蕭瑟建何年徑轉松蘿慘暮烟堂上久無談白法
池中猶自吐青蓮數聲清磬出林杳一黠孤燈耿夜懸
不有支郎肥遯在那令此地得隨緣

冬望

慧秀 六首

倚杖高原白日斜
陰風獵獵起江沙
草枯平野來輕准
葉盡孤村集亂鴉
映郭暮雲全似雪
隔峰寒燒半成霞
誰家茅屋臨溪住
門掩庭梅一樹花

春晚覺公具舟邀到王太古遊惠山時寺新燬

舍筏春郊步屧輕
風流支遁愛山行
雲連錦樹花齊發
火滅金田草細生
石底寒泉供礪齒
枝頭慧鳥若關情
王珣佞佛心偏重
落日空巖禮化城

行藥梅花下

病裡逢春劇可憐
梅花開徧石闌前
淡因日上微矜色
瘦恐風吹不駐年
靜愛寒香浮藥椀
遠驚長笛度江烟
淒涼此際巡檐索
默默相看病入禪

小姑山

江中片石障彭湖
翡翠衣裙像小姑
九派洪濤香澤水
千秋明月晚粧圖
嬌非行雨通君夢
神自分風任客呼
過舫可能無顧盼
莫教烟靄便模糊

竹間聽反舌鳥

細靄輕嵐散竹林
揩頤小坐聽晨禽
未蒸花氣機偏澀
乍寫春聲意獨深
緩引易調多種舌
瑣言難竟一生心
何如隱忍過殘臘
末路風烟恐不禁

金山

江天樓閣映蝦鬚
獨慮清寒不慮炎
霞散雁王開寶藏
月來龍女抱香奩
蒜山風隱漁舟集
瓜浦潮迴水怪潛
烟景飽看禪定後
此生綏福恐難兼

雨夜有感

法濟

寒林疎雨夜瀟瀟獨向松窓坐寂寥
隣燭有光難借照庭花無實果何聊
年華竟逐東流逝鬢雪那教烈日消
聞說沃州山可往駕言歸去是明朝

得養性書

故人寄我白雲牋夢裡身談去住緣萍散偶隨鷗浪遠
松高難免兔絲纏亂緩晚嘯千巖月孤鶴秋橫萬里天
懸想已知湖海味歸來看取在山泉

聊齋詩為譚梁生

圓信

掃除蓬徑延清壑茅屋竹椽非世情湖面香輕荷葉放
山腰澹去樹烟生兩峯斷塔山流影一檻新紅春醉英
詩酒百篇償宿債雪音曲曲被華纓

季弟憶母有作代母次韵答之

大泓

白髮毡毼病骨寒朝來扶杖倚門看風吹柳絮驚春去
月落階除忘夜闌萍跡難縫遊子綾夢魂空識仲由冠
一從暗擲金錢後鎮日依依少進餐

五臺山折斗峰

斯學十五首

樓臺蕭颯雪嶢屹
襍被來登六月寒
古殿西風吹鐵瓦
長空北斗挂闌干
太原山遶中條近
小有天通上界寬
欲向陰厓振鳴策
恐驚林下黑龍蟠

還山答姚叔祥

柔乾會渡大河渾
萬里歸來海上村
姚合詩名從正變
賈公禪理豈旁門
深秋落葉青山晚
近寺寒潮白日昏
五濁世間悲未已
試拈游道與君論

丙申春日沈士英為我寫照賦贈

梅花千樹曾相訪
風雨孤舟復見尋
草坐麻衣空有相
巖棲雲物總無心
禪兼繪理憐摩詰
貌得冥觀愧道林
今日分身應別去
三洲一鉢是知音

送姚叔祥從沈開府入秦

潼關萬里度征人
馬首蕭蕭不見春
已逐塞雲過隴漢
更驅朔雪下洮岷
劒花夜幕占軍氣
檄草寒原散戰塵
自是馮郎憑軾意
五羊何事欲干秦

姑蘇懷古

客遊春艸暗天涯晚色楓橋繫短槎
泰伯廟荒惟古木吳王室廢自昏
鴉風迴沙岸潮初上雲度山城日易斜
滿目興亡千載事不堪惆悵對江花

送徐君實林居

齊女城頭日欲曛戴顥宅畔一尋君
南州几榻花陰下東壁圖書夜色分
刻漏儘催池上月袖衣堪臥石邊雲
小山久已聞招隱桂樹青青白鶴羣

過陳泰初讀書靄雲寺

山中芳艸欲生庭
有客移舟江上停
一水到門容問字
千花擁帳過談經
維摩對處開禪月
太史占來聚德星
今日津梁疲臥者
賴君物外眼雙青

屠長卿儀部過山

海內憐君故倦游
家徒四壁茂陵秋
拂衣豈戀青山臥
擊劍空令白日愁
萬事塵埃歸放達
千金詞賦足風流
相逢蕭寺蓮花晚
更乞明珠照沃洲

自適

天風吹帶倚長松落日臨流見遠峯塞外何心窮失馬
人間無技學雕龍僧來黃葉鳴秋錫鳥散蒼烟起暮鐘
夜淨沙頭涼可適月明一片白芙蓉

寄董玄宰吉士

十年清譽下帷聞晉室風流漢代文匣內雙龍偏吐色
人間萬馬欲空羣鳳池彩筆春烟散祕閣青藜夜雨分
韋杜城南天尺五懷君芳樹有停雲

別陳叔灌

曾記空山對雨時論交已是十年期筆花照夜神飛動
衣藥驚秋佩陸離傳舍有魚長鉗在故園無雁尺書遲
蕭蕭燕市臨風別脉脉何勞問所思

郭外次李環衛遙字

連錢寶馬綺塵消出郭方知遠市朝大塊不迷羣聖轍
小山應為八公招臨風野鳥當歌起帶雨巖花愜賞嬌
題就鶴書那可寄西方落日美人遙

送李白甫歸吳門

同病秋風吹客衣
臨高其奈送先歸
劒歌燕市千金盡
帆指吳門匹練飛
黃葉初來南國雁
白雲應老北山薇
知君家在滄浪曲
依舊寒星繞釣磯

送何侍御謫武昌

一去江湖自有星
三看楊柳映都亭
驪歌別酒分燕市
雁影征帆過楚汀
報國烟霜孤劍白
接天雲樹九峯青
湘南從古多才子
詞賦還應問獨醒

過強善長山樓題贈

城上山光半入樓
翳然林水即滄洲
淋漓醉墨花間雨
蕭颯幽情竹裡秋
白日風流消蠟屐
清時雲臥卜菟裘
僧來飯罷還移坐
貌得生公石點頭

留別李越石

如愚四首

我去君留計不同
含情人逐路西東
秋高霜落依城樹
日冷砧催出塞鴻
息影自當丘壑內
全生惟在斗升中
風塵此會知何地
攜手臨岐歎轉蓬

同友人讌集王雲澤少保園林贈執之任子并懷
少保

尚書府第即園林公子邀歡興更深向日黃柑三寸摘
當風綠蟻十分斟湖光欲暮雲鋪雨天色將寒霜傲陰
潦倒嗟余方外客濫參八座盍朋簪

同郭仰甫游禹門宿王元執懸榻處

深更共擬宿王家小閣青燈映絳紗奴子畏寒燒豆蔻
主人憐客詠蒹葭霜高色萎先開菊城近聲喧後至鴉

一榻久懸曾未下今宵全許借袈裟

方康侯孝廉見過談及金陵舊隱

江介茅菴榆柳環矮籬深徑門常關煮茶正熟來新客
作揖未完問舊山谷鶯梳翎求日曝虛缸擣漿背風灣
野烟荒景非佳趣贏得樗庸遠市寰

過本覺寺三過堂

本中

文公蘭若接村墟滿徑蒿萊歲月餘塔涌寶光含舍利
池涵新水浸芙蓉疎林禽語和清梵古壁蝸涎學篆書

寂寂空堂無過客
來今事總成虛

送夏少尹還古棠

明曠 五首

風塵跋扈見君豪
別賦兼秋轉自高
傲骨一生堪鶴馭
雄心多半付漁舠
芙蓉澤國經霜老
鴻雁江淮過雨號
千里送歸楊子渡
懷人空復戀綿袍

秋日同吳公治明府沈孺真沈稚圭沈伯龍李莫
勝郭張虛諸丈結社大雅山堂得書字

竹掩西園引鹿車
傍城丘壑混樵漁
霜蕪半蝕林堂屐

風鐸時侵石几書白社多情高士駕青山無恙道人裾
不緣湖海成嘉會那得驪珠薄紫虛

送郭少參之晉陽

西風千騎散驪歌綉轂朱幡動綠波攬轡清秋窺澤潞
楊帆明月下滹沱漢臣薊北誰為重國士江南爾自多
屏翰闢城功奏日可能無意問巖阿

雪望懷社中諸友

朔風威發鴈徘徊江雪無端入望來澤國孤城冰是檻

祇園高閣玉為臺萬峰晴色驕天地幾處寒梅破草萊
同社故人都不在夢醒蘭舸剡溪迴

登禦兒城

徙倚荒城萬里思西風蕭颯不勝悲村連古渡山初斷
日落中原鳥去遲雙樹高僧文喜墓千秋舊主越王祠
愁來天地蒼涼外獨立孤雲莽自馳

憨山師自嶺南寄楞伽新疏併書賦答時大師以

弘法罹難廢席遣戍

法果 七首

師于熱海放慈航丹徼朱厓信渺茫天意逆扶金策杖
君恩翻賜鐵衣裳山迴象景風烟黑身倚巒方日月黃
今夕短戈聊當錫蓮花猶在舌端香

冬日答秀公見寄時公挂錫婁江王太史恬淡觀

刺血書雜花經

碧海蒼山各倣居弟兄踪跡近何如三秋逐日貪鴻雁
幾夕臨江弔鯉魚極口鹽酸衰世味滿心寒熱故人書
翻天直是波瀾急不信浮雲點太虛

寄潤兄二首

探奇選勝杖初歸歷歷青山澹晚暉平埜月高鷹隼落
渡江人盡鯉魚飛風搖赤地喧柴戶露響青天濕草衣
翹首碧空雙送目雲川不極樹微微

雲門落落澗淙淙墮地青鞶冷一雙四塞草光迷下界
百年峯影挂西窓山中鞭石天羊醒心際凝灰野馬降
曾詔紫泥呼不起至今人物斷滄江

春日寄潤兄

南北飛騰野鶴蹤灑然身外一孤筇無家剩我三千界
有地輸君七十峯花鳥昔人徵木偶天羊此日驗榜庸
凡夫日見湖雲黑不道春山有伏龍

佳處亭望金山

迎風獨倚最高臺漠漠平沙孤嶼開短塔正如看水立
危峯爭欲渡江來于時白浪千帆下何處青天一鶴哀
興劇不知歸路晚淡烟斜日滿蒿萊

挽寒山坤禪師

幻海蒼茫路杳冥萬竿風竹冷荒亭河神力擁千花塔
門弟親傳一芥瓶亂木曉牽春霧白遠峯寒被夕陽青
回頭恨殺楓橋水嗚咽留人未忍聽

遊曹溪

如能

迢迢一徑到曹源滿目烟蘿寂不喧澗底水隨黃葉度
門前松帶白雲屯秋風斷壁尋身迹落日寒巖見膝痕
禪客空懸千古意南宗今欲就誰論

山居詩

契靈 六首

愛住深山懶更便日來猶未得高眠供爐黃葉雪前掃
就榻青松雨後遷筍地牽繩防免折櫻林響柝畏鴉穿
道人碌碌何多事也要消磨粥飯錢

疎密藤蘿亂石牆帶根松柱竹梢梁已無素壁粘名畫
却有磁爐然異香甕牖封沙經宿雨簾簾穿綫漏斜陽
鬚長髮短樵夫樣草索編衣槲葉裳

好吟何必索枯腸春燕秋蛩事事忙若是胸中銷磊塊
自然筆底露鋒芒野棠綻處山如畫岸菊開時月似霜

文字欲離離未得臨池又覺墨花香

獵火樵蘇自一村危溪畧約引楓根桐陰滿路僧歸寺
雪晝無人虎到門栗破秋原奔稚子筍行新土領兒孫
窮年不耐尋經論活計唯須藥餌存

輕衣薄牖覺春寒紫蕨青芹不厭餐落澗松聲風裏聽
過橋山色雨中看前村竹好常留坐隔塢僧閒每接談
惟解溪清堪照影不知滄海是波瀾

來日何如去日長新年猶說去年強不愁髮有幾星白

且喜身無半刻忙紅燭暗銷松葉火玉梅初點雪花香
蹉跎四十明朝是漸覺雲林生曙光

維揚道中

廣化 三首

短亭楊柳夕陽斜
烟火寒城十萬家
駐錫漫同人駐馬
浮杯莫訝客浮槎
淮南水足千堤雨
江北梅遲二月花
長愧青山未歸去
又驚春色在天涯

登鳳凰洲大士閣

一簾秋水浮高閣
雲自何來拂我衣
西郭殘烟荒萬井

東湖寒月淡雙扉獻珠有女乘潮去乞食何人買渡歸
漫說風波門外險溪山隨地好忘機

輓藕花社主

彈指相逢二十年白雲無恙主人賢寒鎰煮水經千帙
破壁分燈屋半椽去住儘期禪社後死生真愧劫春前
感時還覓開山事集有蓮花鉢有田有藕花集行世

題錢康侯春水宅

通凡七首

誰謂浮家不稱奇幾人乘興學天隨每移沙上鷗邊月

偏泛斜風細雨時
河漢有無逢織女
烟波曾否載西施
明年好向武陵去
春水桃花莫負期

阻風平望道中聞笛同王道安諸侶賦分零字

濕烟千頃壓江汀
簫鼓東來亦斂停
柳葉抱風垂古渡
草光含雨傍孤亭
欲將杯渡同僧日
謾道乘槎是客星
試問漁人吹笛處
桃花能不怨飄零

焦山懷雪浪大師

雨餘江色吐晴烟
柳外千帆背日縣
極目不禁淮甸草

乘潮欲上楚人船
雲萍故擬終行腳
巖壑那堪負息肩
相憶況當春又晚
幾看花落別峯前

善財石石對海門在別峯下

亭亭孤立大江湄
烟水迢遙影共移
一往便知行腳事
相逢幾誤點頭時
海東明月元相照
沙上閒雲似有期
人在別峯長寂寞
機緣休道向來遲

病鶴詩為范君和賦

詢汝何年至雪蘆
蒼苔日日長階除
總知未病頭先瘦

豈是無糧肉漸疎霜月夜深形影澹松風林下夢魂虛
若為不復思遐舉因共牆東隱士居

朱竹為王伯玉賦

碧玉千竿且謾誇別教一種在王家棲來丹鳳同寒色
化去蒼龍帶曉霞雨氣乍浮湘女血淚痕時染蜀江花
傍人遮莫驚桃杏霜雪相依遺歲華

秋燕

雙雙秋燕自相呼短砌疎簾日未晡應有鄉心隨海月

豈同沙雁倚汀蘆歸途不避霜天冷舊壘空留夜色孤
最是江南樓息久烏衣得在夢中無

金山寺

明賢 二首

躡險耕雲作浪遊蓬壺不遠帝王州樓吞海日雁橫下
地涌江村石倒浮千里風濤生枕上一天星斗挂山頭
居僧自說烟波淨帶月歸來不繫舟

題楊文襄公鴻鵠山莊

歲久浸沒屬之他氏
其孫韜甫恢復故賦

曲曲清溪面面山虎臣曾此結幽關晚松猶見大夫節

春草不凋丞相顏欽命久辭黃閣下疎鐘遙度翠微閒
臺階剩有白雲意欲迓隣僧來話閒

消夏灣

大壑三首

拾嶺何曾惜病軀名山次第出平蕪已無宮殿凌千嶂
尚有峯巒匯一湖寂莫到來堪淨業豪華銷盡識雄圖
應憐隔歲期逃暑綠樹薰風興不孤

自涵村渡橫山宿僧舍

天涯朋聚興翩翩村黑波昏亦放船攢島百家寒隱寺

面湖千樹晚藏烟露浮竹葉僧先醉霜落蘋花客未眠
預想詰朝吳市裏夢應隨月遠峯巔

繇碧螺峯經柳毅井至豐圻

碧螺峯頂徑繁迴暝色延波落日催百粵層霞臨海動
五草片雨拂湖來浮家遺策空寒暑廢井沉書獨草萊
料得吾儕機事盡羣飛鷗鷺不須猜

送本無禪師謁五臺

廣莫二首

出門芳草路漫漫驀直曾參婆子禪塞上風塵雙白足

杖頭蹤跡半青蓮重巖雪積僧初定古寺春深花欲然
若問曼殊行履處寒山寂寂水連連

郁母挽詞

郁母曾諳湛氏儀流光不與世相期機梭靜院閒終日
兒女寒窓空所思花影亂離人獨逝鴈行縹渺月初垂
含情最是墳前土猶恨秋風落木時

六月懷石梁

如曉 二首

寒落江城動客心不勝炎酷憶東林樓開雙澗飛泉冷

榻倚孤峯積翠深
晝靜溪雲低
竹色夜涼蘿月散
苔陰烟霞不識人
間暑自別青山夢欲尋

留別丁文統及社中諸友

河橋新雨長春流
軟軟東風欲放舟
行李不多堪自負
交情無限向誰投
幾年踪跡羈如夢
半世浮沈浪似鷗
回首淒淒江上路
綠楊芳草繫閒愁

孤鶴

方擇

耐可秋風拂縞衣
淒淒弔影欲何依
自看野骨天生瘦

獨舞空階客見稀碧海有家寒不夢青田多侶病相違
由來不樂乘軒寵只漫昂藏送落暉

孤鴈

風寒澤國不勝哀雲外還呼舊侶來片影乍迷秋雨暗
一聲初斷暮天開已從塞北先相失縱到衡陽也獨回
岸岸蒹葭深可宿善鳴亦恐有人猜

秋柳

經春徂夏幾攀條此日看來半已凋谿上陰稀門不掩

笛中聲斷思無聊從教涼露朝朝下耐可西風樹樹搖
剩得踈黃如許葉依然臨水拂平橋

秋仲道可為海上游余有徑山棹臨別各賦

德彥二首

我往西山君海東人分山海調還同風迴海水遙天動
雲落山光大壑空病骨不辭穿鳥道詩囊或恐借龍宮
莫因天畔生離思渺小乾坤慧眼中

同友人登松風臺禮竹菴禪師塔次韻

蘭若雲深曲逕迴強隨大朗謾登臺溪山不盡吟邊色
身世應憐劫後灰古樹寒聲吹客步孤城落日帶禽來
塔前高碣君休讀涕泗臨風拂未開

自中臺至西臺

行恣二首

步隨蓮瓣轉溪東滿屐微香颶曉風有客總遊華藏界
無僧不住寶池中平攀玉筍羣峰繞四坼雲根百道通
直怪登臨無侶伴獨隣絳漢友冥鴻

登北臺

臺名叶斗峯
下有龍翻峯

北峯直上不支藜側立中天景忽移獅子窟前晴雨暗
雁門關外朔風悲峯標叶斗凌高漢石被龍翻臥別陂
草樹未秋搖落盡無端遊思動淒其

送屠使君守辰州

弘灝

久向南閩轉餉優又乘五馬上辰州萬家表率稱方伯
千里專城屬郡侯帆綠漢陽江上樹草青鸚武水中洲
計君到日先逢夏一曲薰風足解憂

經沈嘉則先生殯所

圓復

三載頻經櫟社鄉水雲撩亂慘無光令威一自乘仙馭
華表同誰弔夕陽社散十洲增寂寞樓空八咏入淒涼
當年樹欖知何事衰艸離披漸損牆

王公精舍晚步

性航

祇林薄草散輕霞落葉蕭蕭亂晚鴉風冷漸令山骨瘦
月明贏得水容賒幾行樹植旃檀種十畝蓮開優鉢華
雁影忽過僧影靜夜深香露滿袈裟

同航公雨中還山

如安

曉靄宿霧。秋山雙笠。遙遙帶雨還。石磴新穿別澗水。
蓮峯初沐翠。雲鬟香林。唯鳥馴苔逕。幽谷無人閑。竹闌
別去山中。纔幾日。便驚塵色已侵顏。

季秋歸攝山寄白門栗徵父

法通

得歸蘭若赴雲山。萬壑千巖一日還。落日樵人歌自去。
清秋山鳥語。仍聞浮雲似愧身。無繫晚菊還輸鬢早斑。
遙想醉園森玉樹。幾時回首亦高攀。

病中答友人書

智證

不於濩落動孤吟奈此身脫枕簟深夜月到窓虛對影
曉鶯啼處每驚心病欺弱骨渾憑藥費乏黃金欲賣琴
蟲臂鼠肝隨化去漫勞書札問浮沉

過朱環宇居士江上居

讀徹

破屋臨川寒氣生人烟兩岸水光橫聽鐘不過金山寺
望月遙分鐵甕城潮滿客船江口發夜深漁火樹頭明
小窓旅夢初回處無奈霜天畫角鳴

庚戌春暮漫書

文貞 二首

欹斜蓬戶未嘗開恐被閒人損綠苔秧葉刺青春老去
柳花飛白晝長來經函防蠹常翻帙茶竈增薪每熟灰
自笑吾生蕉談幻不過滿腹又何哀

早夏憶雪嶠頭陀及谷響社兄

風熏梅李鼻交香猛憶良朋較日長竹粉褪殘梢展綠
麥芒枯短穗含黃書排古籜蝎延壁話破閒情燕坐梁
鶲臭布衫難自脫何當萍聚謾商量

清明後一日同周孝修賢悅可登胥山有感得悲

字

正勉二首

翠微雙屐路逶迤共謁將軍覓斷碑古墓無人栽檳樹
荒林有鳥喚鴟夷途窮尚想吹簫日子托曾甘賜効時
已過禁烟吳楚俗梨花籍地晚風悲

詠慧雲禪房牡丹

早知仙種出羣芳故謝繁華近法堂情斷御溝違葉使
品高初地占花王不隨粉黛春生座獨伴琴書月轉廊
只恐鷓鴣頻喚雨飄零無袂襲天香

偶題

北邨

昨日事為今日夢
醒時自笑醉時心
何曾白髮畏豪傑
只有青天高古今
乘興放歌千嶂月
凭欄會意一聲禽
當鑪不是無生策
何必長門賦賣金

五言排律附

法華山房為敷竺曇賦

宗泐

山房白日靜政對五蓮峯
援坐沿邊石鶴巢簷外松間
門無客到深徑有雲封
坐冷千林雨香殘半夜鍾道情

甘淡泊身計得從容莫戀一枝穩鳥飛無定踪

新柳

道行

裊裊臨江郭依依傍苑牆眼舒春後雪眉蹙曉來霜鬢
舞腰爭細鶯遷色並黃低垂連草帶亂拂和梅香雨殢
枝猶弱烟牽縷共長隋隄千萬樹目斷意淒涼

和王適齋

如蘭

王師勤遠畧歇馬最深山月黑猿啼樹風腥虎似闌暗
泉流屋底落葉擁林間鍊戟為農器荆釵飾女鬟時清

烽燧息天闊野雲閒銅柱功成後長歌出塞還

海門看落日

慧秀

浩蕩陳胸次長江眺望豪水方三峽急雲佐兩峯高西
日驚浮動北風停怒號火光團赤呀空色闖紅濤浴彩
疑羣鷺揚靈隱巨鱉寶輪羲仲馭萍實楚人操圓象垂
垂入餘霞冉冉韜坐來天地黑蠻霧漲林皋

錢懋穀先生生日賦贈

斯學

升日迴春海連霞逗曉峯溪堂新罨畫江渚老芙蓉星

映真人德天開道者容盡看雙作鳳未數八為龍世界
情堪澹丘園趣亦濃鶯花題欵欵車馬笑憧憧石齒常
留屐山腰不借筇右軍方鄰水上客比臨邛采鞠偏多
藥餐芝更有松精修窮五臍碩學富三冬深竹藏幽閣
垂蘿蔽曲塘琅玕披簡帙琥珀上歌鐘陶遠林中社求
羊徑裡蹤半簾沙月小一榻水雲重詩好傳餘響文雄
入正宗徵書憑赫奕衣褐自蒙茸衆妙皆紛集羣賢總
過從清芬高仰止紫氣挹神丰才力君強健交心我拙

慵頌言將竺梵端只效華封

江禎生歸武林便寄虞長孺

如愚

時勢寡偕偶行藏詎遂心纔因龍井別記得虎林深子
有遠遊志余多避世襟溪寒石淺淺葉落雨陰陰高枕
忘窮達漫交信陸沉才名誠翠羽談麈盡梟音麝在牕
應嗟頭存鏡莫臨幾曾知善惡何必辨輸金明歲西湖
柳虞翻差欲尋

寄贈松寥湛公

通潤

遙憶松寥閣亭亭江水中其人如白鶴御世若飄鴻雙
眼澄秋鏡孤懷敞素空尋花頻冒雨候月不辭風興到
書偏逸神來句自工寧知叔世裡尚有晉支公

悼公朗

通凡

朗公遷化後一榻蘚苔深車馬無來客雲霞有故林孤
鐘晨寂寞雙樹夜蕭森人誦生前偈燈傳結外心山寒
遺鳥夢水涸斷龍吟歲似文星墜光疑舍利沈門人知
痛哭朋好費招尋想像經行處長廊薜荔陰

結社徑山寄懷無期禪兄姑蘇

德彥

不須論法席相對總忘形簾幙鉤天影菴居抱地靈苔
吞雙徑綠樹合五峯青殿倚龍湫險雲生鳥道冥身殘
悽落木心曠任浮萍過客陰廊偈先賢斷石銘短筇花
裏出飛瀑樹頭聽宿霧時藏豹空潭夜聚星柴門闊冷
淡瓦鉢羨清冷采菊多成句看松半掩經逢人忘曲折
行路畏伶仃獨有吳門望時時上翠屏

弔簡公

方擇

此日五湖畔蕭然山寺門數行秋樹落千壑暮烟屯已
謝平生友空懷夙昔言洞雲淒以變塵榻儼猶存自我
甘棲息初君過討論溪頭幾寒暑林下共朝昏別去流
光速哀來墮淚繁陰增生蔓草斜日慘荒原半篋書經
在那堪覩墨痕

春日偕汪明生米君夢郁伯承陸三孺陳宗闇范
長康耕牧隱赴岳水部儀部之招集閒齋限體得

圓字

正勉

良晤惜遲暮常懷伐木篇寄書虛鳥外攜錫慰花前地似西園勝人逾鄴下賢夜珠含照乘星璧耿文天柳葉嬌多態梅花瘦欲禪齒應羣彥後才得二難憐雲逼春衣薄月隨歌扇圓還思賡郢曲刻燭緩鳴絃

七言排律附

秋華亭

良琦

片玉山西境絕偏秋華亭子最清妍三峯秀割崑崙石一沼深通渤海淵鷗鷺隔窓留客語芙蓉映水使人憐

桂叢舊賦淮南隱雪後嘗迴剡曲船北海樽中長激濛
東山席上有嬋娟紫薇花照銀瓶酒玉樹人調錦瑟絃
醉過竹間風乍起吟行梧下月初懸一聲白鶴隨歸佩
何處重尋小有天

古今禪藻集卷二十五